

# Fjallabyggð



## Skráningar- og innritunarreglur fyrir Leikskóla Fjallabyggðar

Leikskóli er fyrsta skólastig í skólakerfinu og er fyrir börn undir skólaskyldualdri. Leikskóli annast að ósk foreldra uppeldi, umönnun og menntun barna á leikskólaaldri samkvæmt lögum um leikskóla nr. 90/2008.

Leikskóli Fjallabyggðar býður upp á leikskólanám fyrir börn frá tveggja ára aldri. Leikskólastjóri og aðstoðarleikskólastjóri annast innritun barna í leikskóla Fjallabyggðar. Að jafnaði skal miða við að leikskóladvöl hefjist eftir sumarlokun leikskóla.

### Skráningar- og innritunarreglur

Sækja þarf um leikskóladvöl á sérstöku umsóknareyðublaði sem aðgengilegt er á heimasíðu leikskólans og hjá stjórnendum. Mikilvægt er að umsóknin sé vel útfyllt.

Öllum foreldrum er heimilt að sækja um leikskóla fyrir börn sín í Fjallabyggð óháð lögheimili en lögheimili í Fjallabyggð er skilyrði þess að barn geti hafið leikskólagöngu sína við Leikskóla Fjallabyggðar. Hægt er að sækja um tímabundna undanþágu vegna barns sem á lögheimili í öðru sveitarfélagi, enda liggi fyrir gildar ástæður s.s. námsdvöl foreldra í Fjallabyggð eða tímabundin fósturvistun á vegum barnaverndar. Í slíkum tilfellum þarf að liggja fyrir samþykki lögheimilissveitarfélags um greiðslu til Fjallabyggðar á leikskólagjaldi fyrir barnið, samkvæmt viðmiðunargjaldi Sambands íslenskra sveitarfélaga og samþykki Fjallabyggðar um undanþágu frá lögheimilisskráningu. Undanþága er einungis veitt eitt skólaár í senn.

Inntaka barna er háð því skilyrði að foreldri sé ekki í vanskilum við Fjallabyggð vegna leikskólagjalda.

Leikskólaplássum er úthlutað ef öllum skilyrðum er fullnægt, eftir dagsetningu umsóknar, skipulagi leikskóla og reglum um forgang.

Reglur um forgangsröðun barna í leikskóla Fjallabyggðar eru eftirfarandi:

- a) Forgang hafa börn með fötlun og skal þá greining vera í ferli eða lokið.
- b) Forgang hafa börn sem búa við erfiðar félagslegar aðstæður samkvæmt mati fjölskyldudeilda Fjallabyggðar.
- c) Börn eru innrituð í leikskólann eftir aldri, það er kennitölu.
- d) Í undantekningartilfellum geta þeir átt rétt til forgangs fyrir börn sín sem sinna grunnþjónustu í sveitarfélagini. Ákvarðanir um slíkar afgreiðslur skulu tekna í samráði við deildarstjóra fjölskyldudeilda, sem ber afgreiðslu sína undir fræðslu- og frístundanefnd.

Við innritun barns í leikskóla getur þurft að taka tillit til aldursviðmiðs á deildum og dvalartíma sem laus er í leikskólanum hverju sinni.

## Að hafna leikskólaplássi

Ef foreldri/forráðamaður barns þiggur ekki boð um leikskólapláss við úthlutun, fær umsóknin nýja dagsetningu nema ef samið er um að barnið byrji á öðrum tíma.

## Dvalarsamningur

Við upphaf leikskólagöngu skrifa foreldrar undir sérstakan dvalarsamning sem meðal annars kveður á um dvalartíma og fæðiskaup. Dvalarsamningur tekur mið af reglum þessum og með undirritun sinni staðfesta foreldrar að þeir hafi kynnt sér gjaldskrá og skráningar og innritunarreglur leikskóla Fjallabyggðar.

Gagnkvæmur uppsagnarfrestur á dvalarsamningi er einn mánuður og miðast við 1. eða 15. hvers mánaðar. Uppsögn dvalarsamnings skal í öllum tilfellum vera skrifleg og skilast til leikskólastjóra. Óski foreldrar eftir breytingu á dvalarsamningi sækja þeir um það hjá leikskólastjóra á sérstöku eyðublaði.

## Leikskólagjöld, vanskil og uppsögn dvalarsamnings.

Bæjarstjórn ákveður gjaldskrá leikskóla og gerir breytingar á verðgrunni að fenginni umsögn fræðslu- og frístundanefndar.

Afsláttur af leikskólagjöldum er veittur eftirfarandi:

- Einstæðum foreldrum.
- Foreldrum sem eru 75% öryrkjar.
- Námsmönnum í a.m.k. 75% námi. Námsmönnum er ekki veittur afsláttur á sumrin, frá 1. júní til 31. ágúst.
- Systkinaafsláttur.

Til að njóta systkinaafsláttar þurfa börn innan sömu fjölskyldu að vera skráð á kennitölu sama forráðamanns og með sameiginlegt lögheimili. Foreldrar greiða fullt fæðisgjald fyrir öll börn.

- Yngsta barn fullt gjald.
- Annað barn 30% afsláttur.
- Þriðja barn 50 % afsláttur.
- Fjórða barn 75% afsláttur.

Einstæðir foreldrar, öryrkjar og námsmenn fá 30% afslátt af leikskólagjaldi þess barns sem ekki fær systkinaafslátt. Einstæðir foreldrar þurfa að vera skráðir einstæðir í þjóðskrá og endurnýja umsókn um afslátt fyrir 1. september ár hvert. Foreldrar sem slíta samvist eða skilja og óska eftir afslætti þurfa að sýna fram á slit sambúðar eða hjúskapar með vottorði frá Sýslumanni. Foreldrar sem eru 75% öryrkjar þurfa að skila inn vottorði frá Tryggingastofnun. Foreldrar í námi þurfa að leggja fram staðfestingu á skólavist við upphaf hverrar annar þar sem fram kemur einingarfjöldi (22 ECTS einingar eða 15 framhaldsskólaeiningar að lágmarki).

Lækkun á gjaldi kemur til framkvæmda 1. dag næsta mánaðar eftir framvísun vottorðs. Afsláttur fellur niður án fyrirvara uppfylli foreldrar ekki skilyrði afsláttar.

Afsláttur sem veittur er á grundvelli rangra eða villandi upplýsinga er endurkræfur samkvæmt almennum reglum kröfuréttar og verður hlutaðeigandi krafður um mismuninn.

Enginn afsláttur er veittur af gjöldum þótt barn sé fjarverandi nema um langvarandi fjarveru vegna veikinda sé að ræða (mánuð eða meira) og veikindavottorð hafi borist.

Afsláttur er gefinn af fæðisgjaldi ef barn er fjarverandi samfellt í 2 vikur eða lengur ef fjarveran hefur verið tilkynnt leikskólánú.

Leikskólagjöld eru innheimt mánaðarlega fyrirfarm. Gjalddagi er 1. hvers mánaðar og eindagi 15. dögum síðar. Leikskólagjöld eru ekki innheimt þann tíma sem leikskóli er lokaður vegna sumarleyfis. Innheimtuferli vegna vanskila er samkvæmt innheimtureglum Fjallabyggðar.

Ef leikskólagjöld eru í vanskilum vegna þriggja mánaða og ekki hefur verið samið um skuldina er litið svo á að foreldrar hafi fyrirgert rétti sínum til áframhaldandi þjónustu og skal leikskólastjóri þá hefja uppsagarferli á dvalarsamningi. Uppsagnarfrestur er einn mánuður og miðast við 1. eða 15. hvers mánaðar. Áður en til uppsagnarferlis kemur skal kanna til hlítar mögulega aðkomu fjölskyldudeildar að dvalargjaldi þar sem um þjónustu vegna barna er að ræða. Leikskólastjóri og deildarstjóri stjórnsýslu- og fjármáladeildar leiðbeina foreldrum um að leita úrlausna.

Ef foreldrar/forráðamenn virða ítrekað ekki umsamin vistunartíma það er sækja barn sitt of seint,, hefur leikskólastjóri að undangenginni viðvörun heimild til að segja viðkomandi upp dvalarsamningi.

Samþykkt í fræðslu- og frístundaneftnd þann 8. október 2015.

Samþykkt í bæjarstjórn Fjallabyggðar þann 15. október 2015.